

Oonze sproak is den stried weerd

Veurzitter Bernard Lohuis van n Kreenk vuur de Twentse Sproak wis in n Weurdke Veurof van tjoarverslag van 1991 nog ees oop t grote belang van t behoald van de Twentse sproak. Het is aj t rech beschouwt den stried weerd. Hee schrif:

Doar mo'w allemoal an metwearken. Nich alman kan mooie verhaaln of gedichtn schrievn mer t oetdreagn deur t te proatn en te schrievn oaveral woar dit meuglik is, is wal t minsten wa'j kunt doen. (Veur wel t nich schrievn kan, he'w oonze lesriege.)

*Om doar wat an te doen he'w vergangn joar n verhaalnwedstried hoaldn. Umdat dit in saamnwearking met de Twents Akademie gung, was de meugelikheid geavn um in t Twents en in t Nederlaands te schrievn. Noadat de jury de inkomende stukn had beoordeeld kwam vast te stoan dat de stukskes dee in oonze moodersproak warn schreavn t beste noar veurn kwaamn. Joa en dan krie'w t oonderzoek van oons lid Hennie Beerlage noar de kennis en t gebroek van t Twentse dialect op de basis-scholen. A'j de oetkoomst van dat alns in oe hebt opnömn, mo'j toch wa eavn noadeankn. Mer al bladerend duur t beukske kwam ik n sprök tegn, woardeur ik weer helemoal de zunnige kaant van de moodersproak zag:
,WOAR GENNE SPROAK LEAWT, IS GEN VOLK.'*

Doarum is t belangriek da'w ok oonze kennis van t Twents in woord en gebroek deurgeavt aan oonze keender, zodat ze oons later nich t verwiet kunt geavn, da'w eer t nich hebt leert. Zo pessimistisch as de Italianen oaver oonze Nederlaandse taal deankt, (alman in oons laand zol in korte tied Engels goan proatn) zo slim zal t noar mien mening met oons Twents nich goan. Loat de moodveern nich hangn, oonze sproak geet nich verleurn.